

D'Chlämmerli-Segg 2024



Därwil isch Drumpf, d'Plaquette e grossi Klass.

S'isch klar worum: Mir sin Donnschtig-Jass.

E meega Fescht für Gross und Chli.

Es het Fuessballstars und Sänger drbi.

Nur d'Ettiger sin muff, es isch nid glooge.

Denn die hän s'ganz Joohr d'Arschcharte zooge.



Das Tempo-30 isch z'Därwil e grosses Thema.

Doch wie's so isch, passt's nid in jedes Schema.

Diä einte wänn durch s'Dorf rase, wenn's emol nid stockt.

Die andere luege lieber, wär immer no im Träumli hockt.

Dr Zahno isch dr Einzig wo drüber cha lache.

Sini Arbet chan er witerhin im Schritt-Tempo mache.



Z'Därwil sin im März wieder mol Wahle.

Kei Wunder gsesch die Kandidate überall um d'Wett umme strahle.

Öb die Grüene, die Orange, die Rote oder die Gäle.

Mir hän d'Qual der Wahl eso öbber z'wähle.

Ei Kandidat freut sich bsunders und macht e riiese Gschrei.

Denn dr Schänggeli het gmerkt, d'Wahlzettel sin portofrei.

D'Plaquette isch jo wieder emol e riiese Hit.

I trau's fascht nid sage, zum Glück macht au e Zürcher mit.

Dr Waggis het e Freud, däm goht's sichtlich guet.

Au die alti Tante lächlet z'friede unter ihrem Huet.

S'töllschte isch, do chasch di gar nid wehre.

Zum Gendere duesch eifach d'Plaquette chere.



Dr Letschi bini wägeme chleine Weh-Weh zu dr Dorf-Drogerie-Dorothee.

Dr Buuch isch flau und d'Zunge ganz wyss.

Uf em WC git's e riiese Gschiss.

Do seit denn s'Dorothee: «Bisch Du verruggt?

Hesch Du s'ganz Päckli Jodtablette gschluggt?»



Was isch au los? Was isch das blos?

Z'Därwil an dr Bahnhofstroos.

Keine B'soffe, kei Damerüschli, s'isch z'schnäll vrbi.

Trotz e Huffe Lüt wo's gha het drbi.

Es het grad glängt zum schnäll dur die Adväntsgass renne.

Will z'Därwil chasch wie immer ab de Achte go Penne.



Im ganze Dorf gsehsch wieder emol Gsichter strahle.

Jede chas e bitzeli besser, mir hän's vom Prahle.

In dr Wandelhalle vo Därwil bim Präsi Dehei.

Wärde Verbündeti gsuecht, s'isch kein meh elei.

E tolls Fescht, doch s'Ganze het e bitzeli g'hungge.

Es het z'fescht nach leere Versprächige g'stungge.



Dr Mäggi, Kiefer, Sahli, Hessli - und jetzt wird noni glacht.

Hän sich zämme uf e Road-Trip gmacht.

Logisch, sin si z'erscht nomol ins Grossmatt ein go Suffe.

Bevor er ab isch, dä drümmli Huffe.

Ihri Fraue hörsch lache, typisch Midlife Crise.

Drbi isch's für d'Männer nur e geili Reis.

Wo si denn ändlich uf die 2 alte Chläpf sin gsässe.

Hesch dr eint scho höre schreie: «Mittagässe!»

Bim erschte Hügeli het dr Hessli scho s'erscht mol chalt.

Denn mache si halt scho wieder e Pausehalt.

Dr Mäggi het gli gseit, die Chäre laufe nid rund.

«Hähh??» Seit dr Sahli, ich wird bim Laufe au Wund.

Aber Gottseidank sin die Chäre nid uf allne Zylinder gloffe.

Sunscht hätte die no meh wie d'Fahrer gsoffe.

Das Tempo isch nid will ne dr Schnuff isch usgange.

Si sin halt eifach an jedere Beiz bliebe hange.

Und wo denn doch emol sone Chare isch verreggt.

Het nur dr Kiefer glache, dä het e Uffträgli gschmeggt.

Das Problem hän si glöst, si griège alles z'klappe.

Aber jetzt isch höggschi Zit zum ändlich emol ein go Schnappe.

Die erschte Azeiche vo dene Strapaze chömme langsam ans Liecht.

E drümmige Chopf, gäli Auge und d'Hösli ganz fiecht.

Sogar dr Hessli lauft jetzt langsam uf de Felge.

Doch das Bild dörfe mir nid zeige, nid emol uf eme Helge.

Und au wäg däm Rütte uf de Chäre obe.

Laufe si alli umme wie dr John Wayne mit gschwullene Hode.

Uf dr Riederpalp im Ziel, das isch dr Hit.

Mache si grad no amene Umzug mit.

Gschtunt hän si ab de ville Därwiler dört Obe.

Dört isch irgend öbbis speziells ImBode.

Me gseht Sälle und Jene, Därwil isch Drumpf.

Dört hinde an dr Bar stöht sogar dr Papa-Möschtli-Schlumpf.

Hätte das doch nur unseri Gmeindrootskandidate g'ahnt.

Zum sich zeige hätte die sicher e Reisli dört ufe plant.

Ei Wallis-Därwiler isch au nid ufe, s'isch einzigartig.

Au das het er verpasst, unsere Dorfpolizischt Martig.



Schön wär jetzt nur no, würde die 4 Helde.

Au mit Schnitzelbängg in Erinnerige Schwelge...



Refrain:

Hösch, hösch, hesch Wösch?

Dasch diggi Wösch!

An unseri Chlämmerli chunnt nur suuberi Wösch!

bliibet suuber...

